

湖長翁文集

三十五之六



漢書門類			
一〇二七	七	一	號
一四	一	一	函
二〇	一	一	冊

內閣文庫			
三	一〇二七	一	漢書
四	一四	一	函
一	二〇	一	冊

內閣文庫			
番號	漢	10271	
冊數	20 (18)		
函號	314	7	



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



江湖長翁文集目錄

淺草文庫

宋高郵陳造唐卿撰

明海鹽王廷俊君英校

三十五卷

墓誌銘

臧子與誌銘

呂正將誌銘

徐氏誌銘

洪孺人誌銘

安人曹氏誌銘

致政朱公誌銘

丁君誌銘

太孺人王氏誌銘

安人張氏誌銘

熊氏誌銘

李君行狀

三十六卷

表牋

太上皇帝壽七十加尊號賀皇帝表

立春日賀太上皇帝慶七十表

賀高宗皇帝慶八十表

壽皇聖帝加尊號賀皇帝表

賀壽皇帝受尊號表

賀皇太后牋

賀壽成皇后牋

賀壽皇帝加尊號表

賀皇帝表

賀太后牋

賀壽成皇后牋

賀皇后牋

賀會慶聖節表七首

賀明堂禮成表

賀正旦表

賀改元表

謝賜曆日表五首

謝太上皇帝清安降赦表

謝明堂赦表

進布表

聖節進貢表

高宗皇帝升遐慰皇帝皇太后表牋四首

祔廟慰皇帝皇后表牋四首

小祥慰皇帝皇后表牋九首

大祥起居皇帝皇后表牋五首

大祥慰皇帝皇后表牋二首

正旦慰皇帝表二首 起居皇太后牋

卒哭慰皇帝表 發引慰皇帝表

冬節慰皇帝表二首 代趙提刑遺表

卷之三十六目錄終

江湖長翁文集卷之三十五

墓誌行狀

臧子與墓誌銘

臧君子與諱鏗楚之淮陰人臧氏郡大族大父翌以承
信郎當建炎兵亂被命通判泗州與權守徐宗誠死守
獨不餌于虜安撫大使劉公光世剡薦例遷終訓武郎
父珪保義郎嘗主管盱眙軍權場二公家世雄于邊敬
賢下士調人之急鄉里訟訴往往為平之既官則就間
樂鄉居不切切于仕君其中子也兒時岐嶷異甚授以

書竹破冰釋遂儒其冠遊場屋如猛將轢陣辟易莫前
驥子一鳴羣馬瘖伏四取鄉書掇如也論者曰是必大
臧氏天以報兩翁耶嗚呼不幸死矣君奉親孝事兄鈞
謹撫弟鏞姪濟之而教之恩意良篤用是弟姪請鄉書
皆有立與朋友敬而信與人節而不固通而不流世之
爲儒粗能文則猥挑選世君尤薄之與予父子遊最厚
居連墻往來無間侃侃也以師命某而文筆與小子頡
頏後先君微疾而死某時客儀真不及視其屬纊久則
歸哭于奠筵而已念之慊然銘以紀其實有以慰君之

靈而信將來予其責亦所以少殺其愧云君生于乾道
乙酉四月八日卒于嘉泰壬戌三月五日享年三十八
以某年某月某甲子葬于某所娶元氏子一方七歲女
二長適進士胡庠次尚幼其銘曰
有茂其姿而嗇其施怛悼喑悲是將曷推不顯其垂視
我銘辭

呂正將墓誌銘

正將呂君卒越明年其弟思忠思問攜其孤瓌以母氏
梁夫人命持所爲君行狀泣謂高郵陳某先兄不幸其

與子遊舊矣敢以墓銘請某惟昔歲客行都獲交君知之甚悉其見敬愈吾知君不容以不文辭君諱思恭字禮夫東平人世業儒曾祖震娶楊氏通經好文元祐間徙京師蓋有志於學也靖康初南渡家于杭祖安道娶陳氏父興祖今梁夫人其配也幼失其父偕二弟事梁夫人幹蠱外疇應肅給遂推擇而仕積官自承信郎至修武郎職初樞密府屬次親王府次監左騏驎院次樞密院正將不及赴受知當路則徽猷閣待制宋公之瑞顯謨閣直學士樓公鑰內相高公文虎大著揚公寅尚

書劉公德秀左史陳公讜右司林公桷薦揚諮委甚至始梁夫人娠君外祖母夢神攜偉男子闖門翌日君生魁梧豐潤符所夢識者曰是呂氏慶也弱不好弄既長果亢其宗惟以奉親爲樂色難志養無所不用其至仕須次不敢遠親夫人未寢不敢退夫人飽食乃甘夫人疾藥物口乃進餽粥手以食嘗病君奉事劬頓幾不救營爲細大與二弟孰議則曰于母故罔或敗事治家嚴而不苛紀緒檢押截然也二弟謹守爲令族君器度凝重性宇粹溫居官廉勤自將與人交務施而不責報人

以匱告多輟已有袖畀之有所予惟恐其知人或負之輒自責曰某時某事似有愧宜得此行孚于人翁無間然及其卒中外聞見咸痛悼如至親廢隸二百相弔曰捐當取之金以惠其下寧復公里間之財際者相告語嘗起母病折券以利我公叵忘城東民尤孺慕也曰甲辰之疫吾輩不腐齒吾微知之公實生我凡君刑于家媚于官德于人其懿如此然皆自事親之心推之理委也必源其徒然歟君好賢而語上愈于已禮之惟恐失色辭勉子弟以學常誨之吾不得逞于書惟是慊然其

令聲懿行乃爾人皆曰是天資嫩是固然然孔子於孝必歷言所可移者孟子謂治民信友悅親其本也君之賢吾得之源委也非耶女弟二長適元氏已亡甥二女甥一婚且官皆君力封殖之次適趙氏君娶張氏先君二十四年歿後娶江氏元祐省魁衍之族也子瓌進士女二人長適承信郎張思義次早世君生于紹興庚午四月二十有六日卒于嘉泰改元四月十日將以某年月日葬于前塘履泰南鄉積慶山之原附先塋也二弟念兄之切置不食頃予孤立尤所感故爲銘曰

江浦長翁文集卷之二十五 四
望之儼乎其容也卽之裕乎其洪也宜于官施于人愛
而周節而通也邈之源孝之充也嗇于邦家則豐也燕
儀斯惟無窮也

徐氏墓誌銘

明之定海多隱君子其儲德毓操家政可法如劉君宜
之最其優者究所以致此實內有彊助其配夫人氏之
力爲多夫人生于慈溪之徐氏歸于劉君有二子二女
其孫三其女孫四其曾孫男女三方其在家女德婦儀
與性而俱不以矯揉暨爲劉氏婦承以順迪以義基以


禮遜延士輯睦鄉閭治生不貪予人不靳然不害其優
裕用能植立門戶爲持家者表式其遇子若孫嚴毅而
不失愛誨誘而不云瀆擇賢師儒授以詩書里之可教
而無力者館贍之爲子孫友逮今庭蘭先侑儀觀偉甚
儒業有聞皆夫人啓其源自幼至老德日以茂譽望隨
之鄉人誨其女必曰盍法是第其族姓必曰劉氏有敬
姜焉見貪嗇者必嗤之曰不愧徐夫人乎享年七十有
八生以某甲子歿以紹熙壬子十月二日其謝世後劉
君幾年而家道益大以治長子某次某未仕長女適某

次適某皆先夫人卒 某某某 孫男也業于郡序孫女長
適某自餘與曾孫男女皆幼平生孳孳懋德聞人善獎
導之恐不遂耳毀訾之言輒不怡素喜佛書屬續之際
超然而逝若釋氏所記者夫生為鄉曲師歿以壽遠若
邇猶曰胡不百年嗚呼真不愧古圖史賢哉某宰是邑
其長子某懷經來客久彌敬一日踵門有請將以來年
春偕先君合葬于香山之原不可無銘非子尚孰宜為
廼為之銘曰

婦德豐世道隆備厥躬始以終我銘之詔無窮

洪氏孺人墓誌銘

孺人洪氏某郡某縣人家蓋甲族祖若禰皆有隱德嫁
為同郡今房州司理余君澤之妻始其歸君猶從事場
屋孺人經理其家務俾得專力于學歷 若干 年果得祿
孺人力為多在夫家克勤撫童隸賓祭躬女工寧自約
不私所有接親姻無廢禮撫童隸不失恩知人緩急周
其乏惟力有謀焉畢其忠或有所規警人素敬之以故
多樂從淑姿懿行纖悉不遺姑氏寢疾从左右省侍饘
粥藥餌非手不進凡枕席濯澣寒燠起居咸孺人焉是



江浦長翁文集卷之三十一
仰凡三歲無少怠姑屬續執其手喟曰汝若是吾何憾
人以為難舅通直君既鰥處性嚴重孺人侍奉順承不
失色蓋十五年暨其卒有庶女二已子撫之為擇佳室
以歸伯氏以毀繼殂其室他適其孤二收育其男女雖
偕其母往孺人顧恤撫存皆不殊已生人尤以為不易
於其難者饑食渴飲然餘優為之士君子或能之孺人
則無愧是足以業家法後佐佑其夫既仕矣推於諸子
誨導之諄復備切皆儒其冠駸駸有立其生以某年某
月某日年若干為余氏婦享年若干而歿時慶元乙卯

三月七日也男四人某女四人長適待補國學生石必
簡餘在室孫男四人某方從學孫女四人皆幼將以某
年月日協吉葬于里居北原高蓋山之下孺人未既歸
識不識愛敬慕倣之司理君居官所孺人居以歿用
是莫不慊焉為之慟司理君父子哀摧痛悼求銘文於
予予與司理君為寮于房其子某又從予遊而甚以學
嘗答之以書者故不容辭而為之銘銘曰
婦儀之秀母道之茂女德之所應有曷不百年以衍厥
後彼固存者末世不朽

安人曹氏墓誌銘

安人曹氏婺之東陽人祖某父某隱不仕歸于郭氏爲
今揚州通判某之妻奉舅姑敬以愛接姒姊穆以順施
于中外歸重無間言治家儉勤隨事區處不御以嚴而
不爽節度家以益振其所以奉烝嘗延賓旅必躬親之
豐備辦集皆如其志而其自奉取足而已衣楚楚則歎
然耳目玩好若浼焉者至於閭里窮匱賙之無靳色安
人兄弟早世母繼逝捐私蓄振之其送終之費一切爲
辦治其赴義甚勇率如此偕通判公宦遊言未嘗及外

事閑御童僕嚴且密及倅維揚安人病不克偕語別勉
以廉勤諄諄也生于某甲子卒于嘉泰辛酉七月十七
日享年六十有四男子三長昌年次昌時季昌宗皆業
儒女子四長適成忠郎王觀國次葉浚次應淙皆進士
次承節郎趙汝樞孫六人女孫四人尚幼以通判再遇
郊恩受今封將以嘉泰癸亥十二月十八日葬于紹興
府上虞縣上雲鄉皂李湖順嶼之原求銘于高郵陳某
某通判公之友也宜爲銘嗚呼安人在父母側已著淑
聞施于夫子婦道以修母道以隆家政紀緒斬斬乎以

媚于其官儀于其鄉胡不百年聞見興嘆然安人學釋
氏有得其淑質懿行書之皆可無愧賢哉銘曰
爲婦而婦君子譽處爲母而母怗燧繼武自家而鄉有
挈其矩善始以終了彼旦暮順嶼之原松茂栢廡亘歲
千百來者燕裕

致政朱公墓誌銘

代人

致政朱公旣卒之二年其子紱走書吳門謂其里人羅
某曰先君襄事有日當有銘捨子誰宜爲某不克辭姑
次其行業始末公諱某字某撫之臨川人曾祖某大父

某考某皆不仕公幼而悟敏學力超邁志未竟考以家
務委之細大區處無遺慮家富而行益修親說之謂吾
子克家而孝撫一弟謂吾兄視吾猶子其族人稱其洪
毅曰嘗陵之不吾較也其鄰里鄉黨賴其訓惠曰頃邑
荒政有緒公則主之至減直發所有穀富室取則價爲
平建東西塾于家受業者赴之待之與其子均蓋其資
質淑茂進善累德得之自然繼以不怠古所謂篤行君
子者歟淳熙丙申甲辰慶壽之恩霈再授修職郎夫人
陳氏賜冠帔以其子士與鄉薦故有此拜乙巳八月十

有六日以微疾卒于正寢享年八十有三子男六人紱
 綬綺績士紘女一人適進士侯賓王先公五年卒孫男
 十四人損復之豐之渙之震之謙之漸之允之益之履
 之革之升之損早卒豐之亦嘗與鄉書餘方就學孫女
 十三人長適進士吳廷秀餘未嫁曾孫男二人將以丁
 未某月某日葬于新豐鄉之奧原某與其子士偕遊場
 屋故得公為詳嗚呼士抱所有不克時施有淵淳無用
 施古今所歎然其裕于躬刑于家孚于鄉足以示規檢
 無窮使凡為子弟為家景其風將曰九原可作則亦可

以自尉銘曰


內之克甚粹而醇嗇厥施積諸其身家而鄉罔底于君
 美以儲利其後人

丁君墓誌銘

士生世以才若德既其窮達則命存焉君子知人且知
 天閱古今無怨尤即丁君之初終益信不疑君信之懷
 玉人樂鄂渚土風因家焉儲德植操輩行古特立士其
 事親孝其行身謹其持家和而節其知識閭里推其賢
 服其化頗被其振拯凡士所當有者君優之求所以然

蓋由學問出君幼則嗜詩禮工著述奉親應物之暇書
 不去目從師友四方不憚也如戴公幾先官儀真苗公
 昌言在秣陵率諸弟從之遊其文新奇渾厚落筆數千
 言一舉于鄂與弟之煒聯鑣忌者以土著藉口訟而聞
 罷君怡然不沮而志加勵自淳熙甲午三舉于漕闈皆
 與計偕則以助邊補授而試然皆屈于春官人為君憤
 惜不平君若不聞益懋于業為古學計其遠大者家有
 室舊榜延桂盤薄其中焚香盥沐課未見書詩與氣益
 昌名與業日隆諭子姪以不倦不息諄諄焉蓋其學有

裕其德義不餒益知士之行由問學乎出盡善無議也
 而不得齒一命以卒惜哉夫積諸身者可及諸物行諸
 家淑諸鄉閭者可施諸君推諸官而事與理違君子天
 人之說至此猶置之歟君之卒紹熙二年十一月壬子
 也享年若干曾祖某祖某父某皆不仕而儒其家收書
 教子汲汲至君父子而盛四弟某某早世某不仕某見
 官襄陽娶章氏生三男曰某某某克嗣其業長女適進
 士江某次適成忠郎趙某將以某年月日祔葬于先君
 之兆以某與君厚且知之審來求銘銘曰



驥也不使馳于千里玉也不使器于璵璠能其人不能其天理則云然其不容沒者世所謂方賢也

太孺人王氏墓誌銘


代人

孺人王氏其先有名宰諱肇者起其家繼是登甲乙科蟬媯有人孺人羣從兄弟也占籍撫之崇仁高祖徙宜黃家焉曾祖及祖日章父徽之孺人早孤隨母饒氏適崇仁之王氏暨笄歸于居士繆公昭字公著孺人在家爲淑女旣嫁爲賢婦訓子持家爲令母爲慶門中外懷服閭里師仰豈苟然是有德焉而其資質之純詣識趣

之高遠足以行之故也始嫁也繼姑李氏嚴甚不假子婦以辭色孺人獨能得其驩心居士簡淡事不嬰慮孺人區處分畫井井不紊居士旣下世則以興起門戶自任治生外延名儒課子孫以書其後薦名禮部相屬也而貲產眎昔亦三倍增其處骨肉之間特厚聚居千指穆如也無間然者娣姒有寡居者幼稚林立夫人撫愛踰已所生家法整整而待下有恩意凡臧獲一人服役則全家仰食環其廬不自炊者蓋數十室性不嚮于財振貧窶恐不力女之不能嫁喪不葬倚夫人而辨自內

之使令外而鄉社不知其幾惠于遠近之人及門無不
 售之物負券無必得之誅平生蒸嘗家廟而已老佛之
 徒禱祠福報之說一不能入至有所丐請則亦不拒施
 予自其天性豈寧惟是舍東樂陂溉田餘二十頃岸善
 頽業田者病之夫人歲任修築有田之家坐享全利不
 與其勞費賙恤之博且果於及人如此性剛明人不敢
 犯有觸其怒尋亦置之不念也凡簿書出納一過不忘
 陰陽五行百家之說皆能知其義生于政和之辛卯至
 紹熙辛亥以終享年八十有一少疾疥耳聰目明生啖

寒茹壯者不逮也歲時為壽子孫後前濟濟僦僦人歆
 慕之當淳熙甲辰我 壽皇上文母壽以其孫嘗與鄉
 薦封太孺人歲丙午 高宗皇帝慶八袞加賜冠帔是
 皆天所以為厚德報非耶夫以富壽康寧加以好德與
 國慶澤者再寓世可無憾然歿之日不惟子孫戚屬摧
 毀攀慕而鄉鄰揮涕咸興胡不百年之悲是何從致德
 之所感而人懷慕有不能忘自然也德偉矣疊疊焉曾
 未始有其有不幾老氏所謂不德有德者歟男三人漸
 先夫人三十三年卒次渙洪女三人長適某官羅次進



士曾參裔次修職郎前福州閩清主簿羅衛男孫六人
長進士驥次謙康仲騏皆鄉貢進士女孫七人長適某
官李次進士曾雁越七年卒次進士羅默次進士羅餘
次國學生羅勳餘尚幼曾孫五人女四人夫人得疾卽
自謂不起預言其期旣革呼子孫前人爲之誨皆可佩
服言畢逝矣乃其所期日十二月之丙子也夫人有得
於中者超卓如此推之於世有本者固如是哉將以某
年某月某甲子葬于所居之水北曾潭之先塋而以銘
文見屬某方縻朝紱母氏且老不克歸營襄奉以爲大

感謂某捨汝復誰宜爲銘夫人於外孫惟某爲獨厚不
以常兒蓄之某今者謬聯班綴不失其身者思所以報
期待也恭惟此恩深重叵疇又其得夫人行實之詳莫
吾母若然其所述亦槩舉有不容詳盡者銘曰

持之有常無爲爲之德之盛也望之士君子其猶病也
允矣夫人得之安行取之性也刑之鄉本之家侈其慶
也曾潭之原松楸鬱然尚百祀之敬也

安人張氏埋銘

安人高郵新安里張氏女也歸于同郡陳某里不喜士

江浦長翁文集 卷之三十一 十四 三六十八
人始嫁莫不以壻儒爲嗤點安人獨陰自喜某貧嗜書
安人捐所有佐廢且幹家政某得以登乙未乙科尉繁
昌職吳門教宰明之定海通守房陵安人同食其祿凡
二十有四年乃卒始某免白丁安人澹如不改常日問
之曰此自吾命何喜陳氏泰于舊安人猶初度也其臨
子弟其處室接物婦人應無者不屑爲之于儔輩不一
小異其佚樂報享亦倍其類生二男子師文師是皆鄉
貢進士孫尿管皆進士封孺人再封安人以某官及格
故其生以紹興壬子十一月十一日其歿以慶元戊午

三月十四日歲庚申葬于華村之西原蓋近其父母家
云將葬夫陳某廼爲之銘埋于墓之左偏

熊氏墓誌銘 代人

夫人熊氏世爲撫之樂安縣天壽鄉人旣笄歸崇仁吳
君某時吳君已授室慕其名德故樂從之吳君有聲於
爲儒旣壯請舍貢數屈于有司喑曰吾自揆可施於國
無路以進施諸家可乎夫人譬解且贊之曰翁才德如
此顧不遇命也淑諸子可也佐其營理不遺力家遂以
饒吳君卒生幾男其三夫人出也繼而異其居所得產

江浦長翁文集卷之三十一
薄甚然不以介懷其後家道日益給足享年七十一而
終其生以宣和之癸卯其卒以紹興之某甲子其持家
鄉人敬慕既歿咸取法焉夫人卓有高識思遵吳君志
篤意教子餘不甚經意每立三子誨以勵業曰汝無以
立于世孤先人望非吾子也始其別居僅有米一困屬
親舊擇師果吾愍卽予是粟外此吾無有得師嚴甚三
子小選怒之往往過當夫人喜曰自今吾可無憂用是
三子爲舉子著名而長子某被某年恩廷試名在第四
夫人不靳于財宗族有不給凡老病若吉凶隨多寡賙

之已之衣食取不饑寒而已性嚴毅不喜飲酒時召諸
婦戒以異姓共處當遵義忍事聞者凜然服行之幼長
雍肅嘗嗤世人徼福懺過一諉之佛書所行則多愧胡
爲耶其言與行率不悖于道法可不謂賢哉陳氏吳君
配也生一女適邑人進士繆時興再娶王氏生一男曰
某一女適樂安進士周鐔夫人所生長曰某次某某今
迪功郎新吉州萬安尉孫男十人某某曾孫三人孫女
五人皆幼將以冬十月二十七日歸葬于浮原天寶山
下走書行都求銘于里人羅某惟夫人資稟高邁守之


疆行之果其篤於教子古敬姜孟母固應如是而起家
應時無一可議不書之無以勵俗且信後故為之銘銘
曰

炳識以為之原蓄德以培之根以大其門以澤其子孫
以善其鄉載之公言孰吾取規敬瞻此天寶之原

李公行狀

論士以賢古也後世去取以貴若勢果貴勢乎取則淵
憲窶人子而季孟師尊至今絀千駟之齊而賢西山餓
夫仲尼其私且矯乎士抱負偉然局不少施以歿其庸

捨諸吾所以直書李君之行於古或無愧君諱知柔字
望之家儀真之珠金沙居郡庠為進士工文辭眾推之
晚年定遷城東隅居面江曰兒從學無便於此弟知剛
今廸功郎新和州烏江縣主簿花君知彰亦與君同其
母二弟與君幼同居長同學怡怡切切始末無間言後
異居推其財於二弟為多君篤孝壯且老念親不衰有
柴地歲貯所收專為追遠費一簪不他用孝友之行著
矣人以匱乏告視其力賙之咸曰是宜掇危科享上壽
為有德報疾作竟不起壽六十八學克矣不得為一命



吏聞見者嗒惜之既病諭諸子汝曹植立未副吾望貧
 無以為學士公患汝幸也田足以自業居足以自庇置
 書榻日吾目不瞑汝不愧名教乎無一語及榮利事結
 纓易簣于以見先哲所學君之識過人遠甚危廢所言
 不失其正賢矣哉曾大父某朝奉郎大父某朝散郎父
 某隱不仕皆葬于儀真之東山母孺人周氏妻楊氏洪
 都龍圖公之孫女四子長大亨幹蠱為優次大節大鑑
 皆鄉貢進士幼大異出後弟知剛女三娘四子兄也適
 馬堯佐孫男六孫女七君生於紹興甲寅歲之二月五

日卒以嘉泰元年正月二十七日葬于楊子縣嗚呼才
 則見用有則見知士宜然也亦孰知夫用而知之有不
 盡其燕裕未既也手植三槐者待諸其子李固一代名
 德其先世豈果抱關隸君之不盡者未勝計而其二子
 取賢書如掇視經史饑餽俛取然其大李氏之門而後
 君之澤倚而需可也予得而併書之

江湖長翁文集卷之三十五終

Table with multiple columns of text, mostly obscured by a large black ink blot.

江湖長翁文集卷之三十六

表牋

太上皇帝壽七十加尊號賀 皇帝表

聖孝有格慈闈晏享於遐齡皇文煥陳寶冊誕揚於大
號觀會通而行禮盡愛敬以事親誠罄九重驩均萬寓
竊惟元聖體道人而之天大君顯親名賓其實天與徒
故享壽祺而有永實既浮則播德美於無疆載籍以來
其事可攷高辛著在位之載曾號榮之靡聞唐帝上應
乾之名揭親德而粗備肇觀盛際不講彌文蜚英騰茂

之罔踰亘古窮今之創見恭惟 盡舜之養繼周以文
方璇穹保佑於嚴君必玉檢鋪張於偉績展采錯事三
辰交驩揚輝奮炎萬世彰信臣叨居外服幸際昌期玉
卮方舉於漢儀瑤城莫陪於虎拜隘千二百歲授筴於
萬斯年追五三六經大書不一而足

立春日賀 太上皇帝慶七十表

願神間燕揭舜德以繫民介壽永延齊堯年之在位適
天序肇發生之日宜皇家疏寬大之恩凡在見聞咸均
鼓舞竊惟仁沾夷夏本乎爲天下得人世享治安孰不

祝聖人使壽况乎躬撫中興之運茂凝退養之休緜寶
筴神授之祥受聖子曰嚴之事縱心不踰矩道承宣父
之傳脩身未嘗衰歲過有熊之永在希有濶逢之令典
見重熙累洽之昌期恭惟 道大莫名功成不有廣運
而奄四海措俗安安難老而彫三光自天保佑將八千
春秋之未艾適五百甲子之甫周嘉與函生同瞻盛禮
臣適拘守土徒切望雲奉漢殿之觴莫陪百執偕華封
之祝倍激寸心

賀 高宗皇帝慶八十表

江漢長翁文集卷之三十六
雞赦疏恩已講號榮之奉玉卮稱慶旋當震夙之期俯
偕率土之歡共上後天之禱恭惟 道傳列聖統接百
王謨烈光昭如文武之共處晨昏色養備曾閔之所難
格天瑞之鼎來喜帝觴之屢舉神筴錫美介八表之遐
齡電樞屬辰衍萬年之洪筭某屬茲守土徒切望雲以
天下而養親身逢大舜祝聖人而使壽心慕華封

壽皇聖帝加尊號賀 皇帝表

肅嚴鳳駕祇造親庭誕揭鴻名推尊聖德凡屬聽聞之
數孰非鼓舞之深恭惟 得道之傳奉親爲悅六府三

事大禹克承帝功五日一朝漢皇蓋有家法謂淵懿之
妙欲推其盛然形容之際實強而名益隆無上之尊不
衍維祺之壽煥聯寶冊前奉珠庭若帝之初歲上儀而
嗣講丕天之慶掩振古以無前臣服采使軺馳神魏闕
想雲趨之列辟獨阻造廷偕葵向之斯民徒知擊壤

賀 壽皇聖帝受尊號表

怡燕間之神授聖有託受徽懿之號媿天其尊亘今古
以用光奄華夷而胥慶臣聞聖人所爲不可以形容盡
神心之妙亦難以稱謂求然人主事親之誠敢忘歸美

而天下被化之久成極推尊上所不得而辭禮之所謂
至盛恭惟 繼堯而治天德用寧咨禹之功已憂庸釋
茂神聖簡寬之化奄帝王號名之隆古與徒亦天與徒
壽必得則名必得煥陳寶冊祇奉慈廷疊矩重規侈慶
源而未沫展采錯事揭丕則於無疆臣夢想中宸身縻
外服覲丕天之盛舉莫預造庭同率土之含生第知擊
壤

賀其皇太后牋

禮奉未央親顏載說慶叢長樂母道益尊凡屬聽聞率

同抃躍恭惟 輔堯爲治授舜承顏歷熙洽之期一嚴
闡教佐揖遜之舉再定睿謀屬嗣皇極尊親之誠推顯
號爲隆古之冠展采錯事三宮均驩騰茂蜚英萬世彰
信濬慶源於孫子遠暨雲來侈樂事於邦家益駢祉福
賀 壽成皇后牋

明主奉親極推尊於聖德皇家行慶實立本於坤儀揭
熙號以媿天見盛時之冠古恭惟 承堯滋久輔舜無
爲措時三登繼紹興之至治儷聖一意承長樂之驩顏
方嗣皇孝治之益隆宜慈極德名之兼懿雖天地之大

不容繪畫然仁聖之妙庶或形容揚輝奮炎擅一時之
盛事燕孫翼子垂萬世之洪休

賀

壽皇聖帝尊號表

代石湖

享承顏之養親付萬幾受賓賓之名妙參三極中天叢
慶率土均驩臣聞至人高謝於聲稱妙道豈容於言議
天地之運固不可繪畫索乾坤之象或亦以健順名况
聖主奉親欲罄推尊之懿而慈皇體道茲當極治之餘
仰鴻號之載熙宜上儀之不藏恭惟 繼堯爲治旋底
三登咨禹畀疇式歌九敘凡授受相與一道而孝儉獨

冠百王從姑汾四子之遊衍箕翼萬年之慶退藏於密
合乎人固合乎天何事於仁得其名亦得其壽茲勤檢
玉前奉凝旒駢祉福於一家掩風馨於二典臣縻身香
火矯首雲霄想祕殿之班莫偕率舞追鈞天之夢徒有
馳神

賀 皇帝表

祇款慈闈誕揚鴻號懋帝功之極盛擅美無前卽聖德
以強名推尊敢後邇遐雖異并躍惟均恭惟 繼統而
興奉親爲說九功惟敘克祗禹命之承一道所傳盡得

舜心之正一遵勤儉庸守盈成謂親恩之大欲極於形容而天德之妙固難於模擬茲嚴檢玉之奉用效運衡之窺益隆無上之尊不顯盡倫之聖增光古昔叢慶朝家臣夢隔帝居身縻琳宇覲丕天之盛事莫預造庭同率土之含生第知擊壤


賀 太后牋

上號名之隆親顏載穆衍邦家之慶母道益尊凡屬見聞率均抃蹈恭惟 儼聖君而立極體坤德以廣生人法地地法天克全道妙堯傳舜舜傳禹一本睿謨方嗣

皇極尊親之誠揭懿號為振古之冠蜚聲騰實顯盛德之形容正國自家襲丕天之祉福豈特掩典謨之巨美抑將示孫子之宏休

賀 壽成皇后牋

明主尊親上儀載歲慈闈叢慶懿號兼崇凡屬見聞均茲鼓舞恭惟 嬪虞輔治咨禹懋功歷三朝一道之傳佐萬國重熙之盛坤順乾而載物迄底生成月承日以為明並稱臨照方嗣聖祗勤於孝治宜母慈同舉於號榮揚輝奮炎侈一時之盛事詒孫翼子垂萬世之宏休



賀 皇太后牋

賓實之名尊親敢後自家而國積慶有源上儀肇舉於
中宸盛事獨超於振古恭惟 睿慈偶聖柔順應乾如
月嬋日以麗天亶資合照暨禹嗣虞而繼統旋底阜民
輔孝治於明君侈號榮於慈極尊獨推於無上壽益衍
於維祺騰茂蜚英掩百王之景鑠重規疊矩示億載之
宏休


賀 會慶聖節表

夢日開祥撫千齡而接統後天效祝縣四海以傾心凡

屬生成均知鼓舞恭惟 聰明稽古信順尚賢離明善
繼而皇圖底寧常久用亨而廣宇不應罄小心而事帝
挽回太和躬至養以尊親晏享多福惟有大德者得其
壽蓋無能名而則之天旋屬虹流之辰茂膺川至之慶
臣限拘持節阻遙奉觴奇齡之邁五龍欣逢聖旦率舞
之同百獸儼近天威

又

里社鳴而啓聖震夙生辰葵心傾而向陽坤維仰德居
匪遙於禹服祝請效於堯封恭惟 稽古有為繼明而



治資兼仁智動合 祖宗孝孚華夷超冠今古武不殺
而品物自遂刑幾措而一夫靡冤故言天有驗乎人而
大德必得其壽適萃渚流虹之日馳寰區就日之誠臣
雖近皇居屬兼漕節奇齡邁莊椿之上但頌延洪率舞
同舜陛之前益勤夢寐

又

龍飛協慶肇臨載夙之辰鼇抃均歡共祝無疆之壽內
外百辟古今一時恭惟 見堯而知紹舜之治離重明
而善繼乾行健以時乘寅奉兩宮躬曾閔所難之行增

光列聖掩周漢而下之君無能名而則之天有大德者
得其壽適屆虹流之日茂儲川至之休臣屬在驅馳倍
多鼓舞受夫帝祉固知天子之萬年借此民區願效封
人之三請

又

萬寶告成偶珎符於夢日九州丕應祝遐筭於後天凡
屬燾持孰非抃躍恭惟 聰明齊聖信順尚賢曆數在
躬祗承大禹之命天地合德紹隆虞舜之華色養奉兩
宮之歡心傳探二聖之妙惟有德得其壽蓋言天驗諸

人肇臨震夙之辰咸瀝誠忱之禱臣屬拘持節阻造奉觴奇齡高邁於五龍欣逢聖旦率舞願同於百獸儼在帝庭

又

祥開夢日方良月之就盈誠切望雲率後天而效祝千齡協運四海交驩恭惟 陶鑄百王批糠衆甫繼堯而治燁乎帝華之重咨禹之功畀以神器之大怡神而友造物釋負而置萬機蓋治身以道之真宜大德則壽必得華旦適逢於繞電遐齡茂介於增川臣秉節畿封馳

誠魏闕借千秋金鑑之獻猶阻造庭紀萬歲崧嶽之呼或能泚筆

又

推里社之鳴辰載逢於震夙效華封之請祝咸暨於坤維凡屬燾持孰非鼓舞恭惟 聰明齊聖信順尚賢勳業五三六經之傳太和二十八載之久堯父禹子古謂無憂帝興王成躬示其法釋負置萬機之重褰裳從四子之遊蓋身佚樂則年彌延而仁滲漉者帝所佑信大德得其壽宜言天驗諸人適當電繞之期自行嵩呼之

筭臣庇身祠宇矯首帝居奉萬歲之玉觴莫窺盛禮上
千秋之金鑑敢後羣工

又

渚流虹而啓聖良月就盈葵傾日以頌君後天難老一
人有慶萬壽維祺恭惟 協帝重華如周過曆躬神武
而不殺掩帝王極盛之功得歡心而寧神盡曾閔難能
之孝格天心之眷佑宜睿筭以延洪適甲觀告祥之辰
誠均夷夏罄華封使壽之請固等岡陵臣夢阻帝居身
縻使節億齡滋永企瞻南極之星三舍匪遙尚遠長安

之日

賀明堂禮成表

因時謹禮告成萬寶之秋配帝禋先茲祀九筵之室純
誠昭格熙事備成恭惟 統輯羣元參稽列聖園丘薦
灌殫精意以屢親重屋揭虔備縟儀而間舉復罄一純
之報恪遵三歲之規敢以宅憂而怠於靈承逮其竣事
則受茲景貺星宿穠潤協氣泛浮乾坤清寧皇心娛豫
翕羣靈而頽祉縣奕世以垂休臣持節畿封注心魏闕
望侍祠之冠佩莫近清光偕擊壤之黔黎賡歌盛事

賀正旦表


千載題期膺璇穹之眷命三朝受籍罄海宇以來王載
維歲序之更端茂擁日新之純嘏凡居率土舉切望雲
伏以參四大於域中地法天而天法道著五始於聖作
正次王而王次春欽曆象以履端本中和而鼓衆庶方
丕應百福惟新恭惟 發政施仁承天從事慶綿慈極
新唐堯在位之年祥著珎圖衍漢帝聞嵩之歲適迓舒
長之旦同躋仁壽之氓臣偶此令辰叨居外服奉玉觴
而上壽徒傾就日之心攷瑤曆以卜年願效後天之祝

賀 改元表

函三體極繼聖治以匹休謂一爲元端宸心而謹始凡
居率土同切望雲恭惟 乾健自強離明麗正龍樓問
寢不違五日之朝瑤曆告祥申衍億年之慶惟視大始
而正本宜和萬民而面王於昭繼志之勤用祀奉元之
號揭茲正朔同彼車書臣忝與使華竊窺帝意謹持盈
之治盪耳目以一新大接統之稱暨華夷而四被

謝 賜曆日表

御四時之氣肇自履端頒一札之書庸昭敦本布此劭



農之政首諸持節之臣俯與民編仰孚德意恭惟
寅恭事帝惻隱臨民管天地之覆持嘉生成遂握陰陽
之遞代元化曲成自璿璣玉衡之齊底攝提孟隤之正
將嗣迎於豐歲爰申錫於成書舉是含生孰非拜賜臣
敢不驅馳原隰勸課農桑雖帝力之何知各安耕鑿俾
田功之克謹仰副生成

又

課清臺之曆庸謹夏時頒太史之書旁周禹服凡王春
之所被仰帝意以交孚恭惟 彌綸兩間甄治萬有神

筭錫美介親壽以永延緯星儷明格天心之純佑上稽
乾運欽授人時正躔離弦望之經節析因夷隩之事莫
重履端之命俯咨共理之良臣敢不存問閭閻服勞阡
陌政捐苛細庶息斯民愁歎之聲職布中和冀迎嗣歲
豐登之慶

又

襲堯之爵仰聖主之無爲行夏之時劭農功而有叙一
扎謹人時之授萬方何帝力之知恭惟 曆數在躬天
人助順陰陽寒暑璿璣玉衡之以齊震兌坎離攝提孟

隤之既正躋斯民於盛富納品彙於中和臣敢不祇奉成書恪勤所職務農重穀少裨大君育物之仁薄征緩刑庶迎嗣歲至和之氣

又

欽崇天道敬授人時課巧歷於清臺具嚴聖作分成書於方國庸劭農功肆令繡斧之臣仰識璿璣之政恭惟至誠贊化溥愛法天高拱帝功之成深惟民事之重五辰坐撫歷數知在於舜躬一札下馳正朔宜頒於漢殿雖聖意亮陰之際體璇穹生育之心臣敢不仰奉至仁

率先羣吏政尚慈惠用安析因夷隩之民瑞迎豐登庶捐歎息愁恨之苦

又

奉一元而司契肅正夏時協五紀以成書均頒禹服凡分民寄仰識聖心恭惟 挺德睿聰承天寅畏心勤民事謹夷析於秋春緒正皇猷嚴勸懲於舒慘究幅員豐富之效繫把握陰陽之功宜一札之所臨率九農之胥勸臣敢不體茲優渥奉以恪恭代庖而布郡條雖無補報載耜而宣上意庶竭罷駑

謝太上皇帝清安降赦表

親顏悅豫慶珍膳之復初帝澤龙鴻覃幅員而無外望
堯雲於咫尺拜漢扎之丁寧恭惟約已奉親重華繼
聖勤顧復之念曾跬步之不忘調寒暖之宜在承顏而
惟謹小乖宣節旋就寧康喜慈極復遂於含飴宜皇恩
誕敷而宥罪伏況太上皇帝陛下德侔高厚仁冒華
夷有增二典之光丕享萬年之福方一人祇勤於色養
惟疾之憂眷兩儀敷佑於皇躬何恙不已尋正周王之
履從封楚府之錢無間邇遐均知鼓舞臣外持使節大

識王言俯與編民效華封三請之祝更資汗簡紀嵩嶽
萬歲之呼

謝明堂赦表

九筵宗祀熙事迄成一札細書湛恩溥暨邇遐雖異鼓
舞惟均竊以合宮班常實統和之所明主教孝昭事帝
之誠雖天子必有尊惟聖人爲能饗間郊而祀得禮之
中均暨有生咸蒙大賚恭惟受天眷命酌古御時參
華祖宗探妙經籍恪勤一意謹三歲之揭虔並侑兩
儀聯百神而賸食緝熙而懷多福歛用以錫庶民粵茲

江清長象文集卷之三十六
食土之毛舉被漏泉之澤三靈敷佑萬世無疆臣使事
所縻帝居徒近執豆籩而奔走莫厠羣工之聯沐雨露
之沾濡俯同一物之數

進布表

如天之覆外暨堯封厥篚之共庸羞楚產前件物出從
荒陋製則單練瘠土所宜謝女紅之纂組彝章有在瀝
臣職之勤渠

聖節進貢表

祝聖主後天之筭俯罄輿情舉海隅食土之毛無非帝

力思效嵩呼之喜敢忘庭實之陳前件物珍毓山川貢
修淮海多儀及物見四方來賀之心申命用休衍萬歲
無疆之慶

高宗皇帝升遐慰 皇帝表

爲天子父永作範於帝臨與造物遊忽乘雲而僊去普
天之下跼地靡遑恭惟 道貫兩儀恩覃萬宇奄違鳳
闕之奉空切龍胡之悲恭惟 妙得心傳愛隆膝下遽
隔承寧之養可勝哀毀之情仰冀睿衷俯遵禮節少思
順變領臣鄰寬譬之言惟用解憂尉聖母摧傷之意

慰 皇太后牋
履纏慈極哀結中闈凡屬生成孰非摧慕 大行皇帝
陛下業光列聖仁浸中區萬歲爲期養歛捐於興慶百
身何贖攀徒切於鼎湖恭惟 協贊帝功翊扶皇運方
聖嗣抱未違之痛宜毋慈寬臨感之悲少慰臣民用安
宗社

慰 皇太子牋

享天下之養方迓寧康悼仙遊之遙偶茲變故邇遐雖
間糜殞可勝 大行太上皇帝陛下執古御今以堯授

舜祉福施於孫子勲業光于祖宗奄違鶴禁之朝惟極
龍胡之慕恭惟 任隆主鬯誠切奉親方聖主哀摧滋
甚天傾之感宜睿情寬譬益勤日致之思豈徒順變以
節斯是曰寧神之太者

慰 皇后牋

慈極未違悼天傾而地坼含生結戀紛雨泣以雲悲闈
政所孚睿情采篤 大行太上皇帝至誠贊化懿範宜
家三紀題期修身可以治國九齡朕夢厭世去而上仙
摧慕之深邇遐無間恭惟 協成兩宮之教祗贊五日

江浦長翁文集 卷之三十六
之朝奄隔承寧益深哀毀仰冀奉先而思孝少荅民情
無如順變以節哀用寬帝念

耐廟慰 皇帝表

禮終襄事孝重寧神廟室有嚴僊游來燕凡在生成之
數可勝號慕之情恭惟 親受堯傳益深舜慕助因山
之禮川嶽効符奠在天之靈羹墻注目事高振古誠格
寰區冀寬天性之悲摧用耐坤慈之眷屬

慰 皇太后牋

定不桃之禮參對三靈申罔極之恩儀刑萬葉凡居覆

燾同極悲摧恭惟 儷德皇居協成聖治悼僊遊之忽
遠瞻廟貌之儼存送終有加率禮不越伏願抑攀號之
至性計詒燕之永圖上寬聖心俯耐天下

慰 皇后牋

陵園志固廟室崇成孝孰大於寧神禮用嚴於追遠恭
惟 密佐龍樓之養忽抱鼎湖之悲協贊聖心掃易月
之舊制參稽祖武燕在天之威靈千祀流芳二儀薦祉
伏冀承寧天故寬譬皇躬仰用耐於坤慈俯亦安於海
宇

耐廟慰 皇帝表

襄事迄成寧神惟重爰考不祧之禮用昭罔缺之謨攀
戀之深邇遐所共恭惟 繼堯守位如舜慕親奉弓劍
於橋山悲纏穹壤儼衣冠於新廟日對羹墻垂顯懿於
無窮嚴繼承之有未冀思付託少節哀摧式遵遺誥之
言仰尉東朝之眷


小祥慰 皇帝表

慈極上賓痛無甚者天時已駛祥則御嫌名然想淵抱之
纏悲暨海隅而揮涕恭惟 繼堯守位如舜慕親自驚

與慶之違緬想鼎湖之隔思萬物莫為之報備竭孝誠
謂三年乃免於懷力行古制事光今昔哀動華夷當春
秋炎涼之已周宜霜露悽愴之增感願思託付少抑悲
摧

小祥慰 皇太后牋

慈闈棄養天運如流望隔鼎湖悲纏長樂恭惟 早偕
多難同建中興方期萬年耆艾之祥遽有一旦幽明之
隔藏稽山之弓劍徒想僊游閱漢曆之春秋已周星歲
霜露之感君臣所同尊矧極於母臨哀有聞於天至願



寬聖念少尉輿情

小祥慰 皇后牋

聖主謹終力行古制天時遙運俄閱歲周誠感寰區悲
纏中禁恭惟 肇偶龍飛之運久承鳳闕之顏斯萬年
參與慶之朝遽一旦有鼎湖之痛屬茲祥制深切睿情
冀有以寬聖主之哀思所以尉天下之望

小祥慰 皇帝表


聖君慕親豈哀摧之庸釋玉曆紀敘適寒燠之已周普
天之涯踏地莫處恭惟 羹墻在念衰絰以居貫兩儀

而與通行百代之既絕盡謹終追遠之義聖者能之推
節哀順變之規期已遠矣願思託付之重少寬悲毀之
懷

小祥慰 皇太后牋

僊游寢遠星歲忽周痛結東朝悲纏率土恭惟 作配
上聖收功中興含飴九重當聖子躬問安之養乘雲一
旦屬慈皇有厭世之心茲歷春秋之更宜深霜露之感
冀寬摧慕以迪壽康

小祥慰 皇后牋



江油長翁文集 卷之三十六 十九
頃自慈皇宵然厭代蠢茲率土摧若無生甫臨祥制之
期益切坤儀之痛恭惟 輔成聖治偕罄孝思躬服衰
麓行古者三年之制感深霜露歷星纏二氣之同可無
寬譬於皇情庶以慰安於聖母

小祥慰 皇帝表

仰慈極之僊游邈焉寢遠稽攝提之歲敘倏爾旣周哀
切中宸感深率土恭惟 慕親之篤亘古莫儔受精微
之傳揭爲聖治念鞠育之厚備極孝思心注羹墻體安
苦塊德通天地誠動華夷方祥制之甫臨計皇情之彌
切願寬聖性遵節哀順變之文庶奉母慈盡謹終追遠
之義

小祥慰 皇太后牋

海宇天傾慈皇仙去期云已久哀則有餘恭惟 蚤擅
媯皇之功光輔文考之治謂緜億齡之壽同享五日之
朝稜遽結於橋山感益深於輿慶甫茲祥制倍切皇情
冀抑哀摧仰以遵遺誥之訓用精調御庶少寬嗣聖之
心

小祥慰 皇后牋

江漢長翁文集卷之三十六
聖主慕親之切亘古窮今海隅感化之深踰天踏地矧
惟坤德架極睿情恭惟 順事慈皇周旋聖孝屬茲一
旦仙馭爲帝鄉之遊胡不萬年禕衣陪鳳闕之養期雖
已久哀則未忘願抑至情式遵中制

高宗大祥起居

皇帝表

代石湖

酌祖有臨尚茲遏密奉親爲悅可後燕怡再更祥制之
期倍極皇情之感恭惟 受舜之託見堯而知法度用
彰彌切羹墻之念歲時亟易自興霜露之懷然禮本稱
情孝當養志願儲祉福仰寬三宮追慕之情用億神人

俯慰四海勤劬之望

高宗大祥起居

皇后牋

服堯結戀彌惻皇心承舜解憂率資陰教禮無違者祥
則御嫌名然恭惟 儷聖膺圖自家刑國共底天民之阜
孰非祖武之繩弓劍已藏攀龍胡而寢遠羹墻如在悵
駒隙之莫畱倏臨再期冀襲多祉庶裨養志之孝以燕
在天之靈

高宗大祥起居

皇太后牋

太上神遊彌切羹墻之念慈闈淵抱每興霜露之懷奄

屆祥除益深摧慕恭惟 補天立極媿聖膺圖輔三紀
之垂裳靖四方而按堵仰橋山之結戀望斷龍胡悼義
馭之迅遷感深駒隙情則痛甚時方御嫌名然願抑悲摧
調瓊膳玉食之御益迎壽祉慰聖子神孫之心

高宗大祥起居 壽皇聖帝表


堯喪躬服舜慕日深悼天運之已過倏祥除之甫暨緬
惟注想尤極增悲恭惟 聰明憲天仁智冠古起積弊
之俗處縷麓者三年盡大孝于親立標準於萬世竊思
痛甚之念未愍御嫌名然之時願寬攀摧益厚宣節仰順

慈幄含飴之適俯安聖君問寢之心

高宗太祥起居 壽成皇后牋

服堯之喪莫攀僊馭輔舜之孝允屬坤儀倏祥制之甫
臨計哀悰之彌切恭惟 克躬婦道合德聖心方 慈
皇奉親茂揚彤管之教適 太上厭世悵然白雲之乘
輔行三載之麓縷共示百王之檢柙劇神遊遠矣之痛
適淵抱御嫌名然之時冀抑悲摧慰聖心之養志益思寬
譬奉長樂以含飴

高宗大祥慰 皇帝表



江州長安文集卷之三十六
四海纏悲服堯喪而甫既九重養志體舜慕以未忘逮
此祥除可勝淵抱恭惟配天與合繩祖有臨孝理冠
於百王道原得於三聖治而繼治坐臻法度之彰嘽有
爲嘽益注羹墻之念方慈極畢縗龕之制宜聖君進寬
譬之言閱駒隙之光感暑寒於天運問龍樓之寢叢福
慶於皇家

慰 皇后牋

燕高廟之神百靈薦敬畢堯喪之服三殿纏悲情則御
名然禮無違者恭惟道尊儷極教始自家端有姒之

儀刑輔成聖孝想橋山之弓劒易閱天時倏屆祥除益
深感慕冀迎祉福上解兩宮之顏永億神人俯偕四海
之望

正旦慰 皇帝表

親養奄違方宸衷之在疚天行已駛倏歲叙之更端舉
海宇以悲纏識君心之痛甚恭惟尊惟歸父契堯舜
之相傳孝則動天雖曾閔而有愧五表始還於素幄三
年躬服於麤衰簡策所無華夷胥感屬屆元正之旦遐
追五日之朝想惟至孝本於寧神而節哀所以順變俯

江漢長翁文集卷之三十六
安率土之望仰慰在天之靈

慰 皇帝正旦表

龍髯莫攀凜聖情之在疚駒隙已駛倏歲律之載新凡屬燾持可勝跼踖恭惟 色養之謹超冠古今孝思之誠感格天地念萬物莫親恩之報而三年茹服舍之哀緬聞異域之傾心咸仰中天而稽首況暑寒之遞易凡燧火之幾更冀奉東朝之顏用承眷注勉遵先帝之訓少節悲摧

起居 皇太后牋

更三聖之傳離明善繼極兩宮之奉坤德彌尊格宗社以儲休自閨門而叢慶恭惟 德兼任姒教被家邦立極中與之初含飴累洽之旦助揚神化人法地而法天密啓帝衷道傳舜而傳禹而況蘿圖增固冀莢告祥塵外風光晏襲三靈之祉壺中日月長稱萬壽之觴

卒哭慰 皇帝表

稜纏慈極致養莫追痛結宸衷歷時斯久普天內外望日悲摧恭惟 全大孝以奉親盡誠心而繼志茂隆聖德有增上古之光申介親齡宜行萬年之福瞻興慶以

江浦長翁文集卷之三十六
如在悼鼎湖之莫攀亮陰方仰於不言成事俄聞於易
祭伏願少裁戀慕之痛注念繼承之艱恪遵遺誥之言
益思順變欽奉東朝之養庶用解憂

發引慰 皇帝表

親聞棄養天運如流柳馭戒期倏驚緬邈楓宸未慕尤
極悲摧恭惟 心合帝王孝踰曾閔掃易月之陋念親
德之難酬告因山之成悼僊遊之益遠睿斷負超於今
古哀誠丕感於華夷伏願少抑至情俯循中道式慰東
朝之眷是誠 先帝之心

冬節慰 皇帝表

養違親極莫追五日之朝候變天行倏屆一陽之復眷
流光之已駛仰淵抱以奚堪恭惟 襲爵紹堯奉親如
舜養志爲大收帝王力行之功承顏不違盡曾閔難能
之孝謂萬年勤鳳闕之事迺一旦抱龍胡之悲邇遐無
間偕痛天傾代謝不停甫臨日至想宸衷不已之慕結
親德罔極之思共願仰慰母慈俯矜民欲任大守重謀
惟宗社之休順變節哀少寬霜露之感

又

江湖長翁文集 卷之三十一
親闈不待悼杞國之天傾歲運已行書魯臺之日至悲
纏淵抱痛極民區恭惟 如舜紹堯傳心是道窮今亘
古盡孝於家方勤興慶之朝遽紹鼎湖之稜報德罔極
緬帝鄉白雲之遊流光不居甫陽氣黃宮之復共願納
近臣之寬譬解慈極之悲摧力務寧神是爲順變

代趙提刑遺表

雨露疏恩許還官政陰陽爲寇莫究天年尚延屬續之
期少布戀軒之悃伏念臣受材么麼逢世休明策足仕
塗素佩教忠之訓致身朝列音蒙越次之知繼三把於

州麾仍屢持於使節罷駑自力期上最於中天試用用
功偶逃刑於司敗氣衰得疾福過挺災思假息於清閑
用祈哀於洪造俞音賜可指里社以未前大數有終寧
膏肓之容療將殞生於泉夜終結戀於聖時忍一死於
須臾思片言之補報仰祈聰察俯鑒哀誠伏願 力行
帝王遴擇文武集和戎之福普暨華夷收偃伯之功用
光今昔大孝念無窮之計慕親寬弗及之悲綏御至和
演椿齡於西極寅羞備奉供綵戲於東朝儻天地之恩
猶或聽之則螻蟻之願於斯畢矣

